



PAHAYAGAN SANG PARTIDO KOMUNISTA SANG PILIPINAS ★ ISLA SANG NEGROS

ANG Paghimakas

GINAUBAYAN SANG MARXISMO-LLENINISMO-MAOISMO MARSO 2023

Pakyason ang dagko ug kusganon nga ataki sa kaaway!

Komiteng Rehiyunal sa Partido sa Isla sa Negros

Marso 29, 2023



ANG KOMITENG REHIYUNAL SA PARTIDO Komunista sa Pilipinas sa isla sa Negros (KRN) nagpaabot sa usa ka mahimayaon nga rebolusyonaryo ug militanteng pagtimbaya sa mga Pulang kumander ug manggugubat ilawom sa Apolinario Gatmaitan Command sa Bagong Hukbong Bayan (AGC-BHB) sa Negros, sa mga rebolusyonaryong masa sulod sa mga organisasyong masa ug organo sa gahum pampulitika, ug mga alyado sa BHB sa ika-54 nga anibersaryo sa makasaysayanon nga pagkatukod niini. Ang BHB nga nagsugod lang sa 60 ka manggugubat nga may siyam ka matag-as nga

kalibre nga armas sa ikaduhang distrito sa Tarlac sa pagtukod niini niadtong Marso 29, 1969 nahimo nang nasudnong rebolusyonaryong Hukbo sa katawhan. Nakapundar kini sa sobra 110 ka larangang gerilya sa 74 ka probinsya sa kinatibuk-ang 85 ka probinsya sa Pilipinas. Nagpakyas kini sa tanang kontrarebolusyonaryong giyera nga gilunsad sa nagpuli-puli nga mga rehimen sa reaksyonaryong nagharing hut-ong sa dagkung komprador burgesya ug agalong yutaan.

Atong dayegon sa usa ka mahimayaong pagscelebrar ang atong bantugang mga kadaugan

sa padayon nga pagpasulong sa nasudnon demokratikong rebolusyon pinaagi sa malanatong gubat sa katawhan bisan pa sa nagkagrabeng pasismo ug barbarismo sa reaksyonaryo ug pasistang mga nagharing hut-ong.

Sa isla sa Negros, ang kalig-on sa BHB napanday taliwala sa pinakatiranikal ug barbaro nga kontrarebolusyonaryong giyera sa nagpuli-puli nga mga reaksyonaryong nagharing rehimen ug sa kasamtangang rehimen US-Marcos II. Kini nga kontrarebolusyonaryong giyera nanalipod sa mapahimuslanon ug mapig-otang alang-alang kolonyal ug alang-

alang pyudal nga sistema sa mga dagkung agalong yutaan-asyendero, komprador ug dagku nga burukrata sa isla. Padayon niining giguba ang kinabuhi sa katawhang Negrosanon. Walay hunong ang pag-agas sa dugo

gikan sa lawas sa mga rebolusyonaryong martir, mga mag-uuma ug mamumuo sa uma. Ang makamatay nga kontra-insurhensyang kampanya sa pag-ensirkulo ug pagpiit sa pasistang militar parehas nga nagpuntirya sa mga mang-

gugubat sa BHB ug mga sibilyan.

Sila Romeo Nanta, Jeren Vargas, Flor Ceballos, Kerima Lorena Tariman, Ericson Acosta, Marilyn Badayos, Cheene Dacalos, Virgilio Tamban, Rodolfo Leo John Azucena, Arjen Mahinay, Ricky Altariba, Andre Cose ug daghan pang mga kauban ang nahimong rebolusyonaryong bayani ug martir gikan sa lain-laing mga larangang gerilya sa Negros. Ang ilang mga pangalan dugang sa hataas nga listahan sa mga rebolusyonaryong martir ug bayani sa Negros nga naghalad sa ilang kinabuhi para sa rebolusyon sugod sa rebolusyonaryong pakigbisog sa isla sa tunga-tunga sa dekada '70 hangtod karon. Nagdugang sila sa kalayo sa determinasyon ug militansya sa mga rebolusyonaryong pwersa para sa makunayong pag-abante sa nasudnon demokratikong rebolusyon ug pagkab-ot sa nasudnong kalingkawasan, tinuod nga demokrasya ug hustisya sosyal. Ato silang pasidunggan ug himuon nga maa-yong sumbanan ang ilang kinabuhi.



Ang batakang mga prinsipyo ug hustong linya sa pagsulong

Niadtung tunga-tungang bahin sa dekada '70 ug dekada '80, sa pagdilaab sa sosyo-ekonomikong krisis sa alang-alang kolonyal ug alang-alang pyudal nga sistema sa nasud, nikusog ang rebolusyonaryong pakigbisog sa katawhang Pilipino ug paspas nga nisulong ang nasudnon demokratikong rebolusyon pinaagi sa malinatong gubat sa katawhan. Lag-

sik nga nisulong ang pinakalapad ug pinakakusog nga rebolusyonaryong armadong pakigbisog ug ang ligal nga demokratikong kalihukan sa katawhang Negrosanon ilawom sa pagpangulo sa Partido Komunista sa Pilipinas (PKP) sa isla sa Negros para makaamot sa pagpahait sa rebolusyonaryong pakigbisog aron kab-oton ang nasudnong kalingkawasan ug tinuod

nga demokrasya.

Paspas kaayo nga nidaku ang bantugang kusog sa rebolusyonaryong kalihukan. Sustenido nga nakalunsad ang BHB og mga anihilatibong taktikal nga opensiba, nakapundar og halapad nga bayseng masa nga naka-impluwensya sa dos-tersiya sa katawhan sa tibuok isla ug nakatukod og mga organo sa gahum pampulitika sa

MARSO 2023



ANG *Paghimakas*



angpaghimakas@protonmail.com



negrosrevportal.wordpress.com

lapad nga kabanikanhan. Nikusog ang agraryong rebolusyon hilabi na sa mga interyor ug intermedya nga lugar tungod lig-on ang mga organisasyong masa ug adunay presensya sa BHB. Ang mga dagku nga agalong yutaan napugos nga biyaan ang ilang mga kayutaan sa maong mga lugar.

Sa pinakakusog nga pagsulong, nilupad palayo sa kamatuoran ang panghunahuna sa mga “wala” nga oportunistang mga anaa pa sa sulod sa Partido. Nagdamgo sila ug dakung mga lakang nga lapas sa aktwal nga katakos ug nisimang sa batakang mga prinsipyo sa Partido.

Nitumaw ang mga pagduda sa katukma sa alang-alang kolonyal ug alang-alang pyudal nga pagtuki sa nagharing sistema sa nasud ug sa estratehiya sa malanatong gubat sa katawhan. Nadani ang pila ka kadre sa mga dagku nga imprastrukturang proyekto ni Marcos. Ilang giplastar ang mga ideya nga alang-alang kapitalista na ang Pilipinas ug dili na haom ang estratehiya sa malanatong gubat sa katawhan; nga mas haom ang insureksyon sa kasyudaran sa pagtuo nga signipikanteng nikuyos ang populasyon sa mga mag-uuma ug mas nidaghan ang ihap sa mga mamumuo. Base niining pagtuo, gidisinyo sa Negros ang

“*war front strategy*”—nga ang tanang nataran sa pakigbisog mga teatro sa giyera.

Gipa-init ang urban ug mga sentro sa lungsod sa mga ispektakular nga bira sa mga partisano. Nisulod sa wala sa panahong regularisasyon ang BHB pinaagi sa pagtukod sa mga absolutong konsentradong mga platon, kumpanya ug usa ka batalyon. Kining mga absolutong konsentradong mga pormasyon lisud isusteni ug nahimulag sa masa. Sa pinakabatakan, kini adbenturismo ug “wala” nga oportunismo.

Wala nagdugay, sa tuig 1988 pataas, nawad-an og inisyatiba sa pagpakiggubat ang absolutong konsentradong mga pormasyon hangtod niresulta sa mga kapakyasan, pag-atras ug paghuyang sa rebolusyonaryong armadong kalihukan. Hapit kini maguba niadtong 1993 sa dihang nisipak sa lawas sa Partido ang tibuok KRN. Sa sulsol ni Arturo Tabara, wala nisunod ang KRN sa desisyon sa ika-10 nga plenum sa Komite Sentral sa PKP nga paglunsad og kalihukang pagtul-id ug pagbalik sa mga batakang prinsipyo sa Partido nga napatik sa mga dokumento sa Unang Kongreso sa Partido niadtong Disyembre 26, 1968.

Niadtong 1993, naagian ang daku nga kadaut sa mga rebo-

lusionaryong pwersa sa isla sa Negros sa dihang nisipak ang KRN sa pagpangulo ni Tabara ug ni Etabag sa PKP ug gipugos ang ilang sayop nga linya. Nadala man nila ang sobra 400 ka ginsakpan sa BHB sa ilang mga sayop nga panghunahuna ug lakang. Gitukod nila ang gagmay nga grupo nga ang pinakadaku ang Rebolusyonaryong Partido ng Manggagawang Pilipino (RPMP). Ila usab gitukod ang ilang armadong pako, ang Revolutionary Proletarian Army (RPA). Nahimong hul-os nga mga rebisyunistang traydor ang mga isplitista. Ang Alex Bongcayao Brigade (ABB) ni Nilo dela Cruz sa Manila niipon sa RPA ug nahimong RPA-ABB ang armadong pako sa mga rebisyunistang traydor sa isla sa Negros.

Ang mga plano ug lakang sa mga rebisyunistang traydor mas pagsabotahe sa pagsulong sa rebolusyonaryong armadong kalihukan sa isla. Nahimong hul-os nga kontrarebolusyonaryo ang mga rebisyunistang traydor dihang nisur-render sila sa rehimeng Estrada niadtong tuig 2000 ug nakigtinabangay sa reaksyunaryong Armed Forces of the Philippines (AFP) sa ilang kontra-insurhensyang mga laraw batok sa rebolusyonaryong kalihukan.

Ang IBKP sa isla sa Negros

Taliwala sa pagsipak sa mga rebisyunistang traydor, adunay 70 ka elemento sa BHB sa Central Negros ang nagpadayag sa ilang baruganan sa batakang prinsipyo sa Partido ug pagkuyog sa Ika-duhang Bantugang Kalihukang Pagtul-id (IBKP), mao usab ang mga kadre ug ginsakpan sa Regional Mass Movement Commission (RMMC) ug Partisan Front Committee (PFC) nga nagbase sa urban. Sila ang nahimong pasiyuna nga base sa Probisyunal nga

Komiteng Tigpatuman (PKT)—ang kapangulohan sa Partido sa isla nga gipuli sa nisipak nga KRN.

Sa paglunsad sa IBKP sa isla sa Negros sugod 1994, subling gipalig-on ang pulitikal nga linya nga nasudnon demokratikong rebolusyon pinaagi sa malanatong gubat sa katawhan. Subli usab nga gigunitan ang estratehikong linya nga liyokan ang kasyudaran gikan sa kabanikanhan. Giklaro pag-usab nga ang armadong pakigbisog ang prinsipal nga porma

para sa pagpundar sa pulitikal nga kusog sa mga rebolusyonaryong pwersa ug sa pag-ilog sa gahum pampulitika. Natin-aw ug gitul-id ang mga sayop nga linya sa insureksyonismo, adbenturismong militar pinaagi sa wala sa panahon nga regularisasyon sa Pulang hukbo, ug parlyamentarismo isip mga dagway sa “wala” ug tuo nga oportunistang linya sa pulitika. Ang subling pagtuboy sa husto nga linyang pampulitika nagtungtong sa pagpatin-aw ug

subling paghupot sa hustong pagtuki sa katilingbang Pilipino nga alang-alang kolonyal ug alang-alang pyudal.

Nahimong mas masanagon ang IBKP sa PKP sa dihang nagdepek si BGen. Raymundo Jarque gikan sa reaksyonaryong AFP niadtong 1996. Matod pa ni kanhi BGen. Jarque sa iyang pagdepek sa BHB, “dunot hangtod sa dugokan” ang nagharing reaksyonaryong sistema sa Pilipinas. Kini nga depeksyon padulong sa rebolusyonaryong kalihukan naka-impluwensya sa pagdepek sa usa ka tim sa Citizen Armed Force Geographical Unit (CAFGU) nga may dalang tulo ka tag-as nga kalibre nga armas ug sa pagkatukod sa Negros Paramilitary Veterans Association ukon NPvA nga ningsalmot sa ligal nga demokratikong kalihukang masa ug niduso sa ilang demokratikong katungod ug mga demanda.

Dungan sa paglunsad sa IBKP, gipailawom sa reoryentasyon, redipinasyon sa mga tahas ug re-deployment ang BHB. Gitukod gilayon ang Probisyon nga Komite sa Distrito nga nagbase sa tulo ka barangay sa Guihulngan, Negros Oriental. Aduna kini *undersized* nga platoon nga sentro de grabidad (SDG) nga naglihok

sa limitadong radyus. Anaa sa palibot ang upat ka iskward nga naglihok ug nagpatuman sa gimbuhatong masa sa mas lapad nga radyus. Gilayon gitagaan og atensyon ang subling pagpundar sa mga larangang gerilya isip mga base sa paglunsad sa kuyanap ug sunson nga gerilyang pakig-gubat base sa nagkalapad ug nagkalawom nga baseng masa.

Sa tuig 1997, ang gipadala nga usa ka iskward sa BHB para sa gimbuhatong rekoberi ug subling pagpundar sa larangang gerilya sa erya sa Binalbagan, Himamaylan, ug Kabankalan, Negros Occidental ug Tayasan ug Jimalalud, Negros Oriental nahimong sobra platoon kadakuon pag-abot sa 1999. Ang usa ka seksyon kadakuon nga yunit sa BHB nga gipadala sa Canlaon City, Negros Oriental para magpundar og larangang gerilya niadtong 1998 nahimong platoon paghuman sa usa ka tuig.

Ang natukod nga Komiteng Rehiyonal sa PKP sa Negros niadtong Enero-Pebrero 1999 aduna nay tulo ka larangang gerilya nga naay kinatibuk-ang ginsakpan sa Pulang hukbo nga 130. Dihay yunit sa Hukbo nga gamay nga kompanya kadakuon sa Larangan 1 sa Guihulngan, sobra-pla-

tun kadakuon sa Larangan 2 sa erya sa Binalbagan-Himamaylan-Kabankalan-Tayasan-Jimalalud ug platoon kadakuon sa Larangan 3 sa erya sa Canlaon City, ug San Carlos ug Don Salvador Benedicto, Negros Occidental. Adunay napundar nga mga organisasyong masa nga may kinatibuk-ang ginsakpan nga 7,500 ug anaay kinatibuk-ang baseng masa nga 37,500. Gilayon nga gitul-id ang tendensiya nga mag-*over reach* (sobra nga pag-inat) pinaagi sa *leap frog* (paglukso sa layo) nga pagpadala og iskward sa erya sa Cauayan-Hinobaan-Ilog-Candoni-Kabankalan-Sipalay (CHICKS erya), Negros Occidental niadtong 1995. Gipabalik ang maong yunit kay may peligro nga mapuo tungod sa gidaghanon pa sa RPA-ABB sa maong dapit.

Ang panawagan para sa mga pwersa sa kasyudaran nga mag-*padeploy* sa kabanikanhan ningresulta sa pag-pultaym sa 78 ka kadre sa kabanikanhan gikan 1994 hangtod 1998 ug nidawat sa mga gimbuhaton sa armadong pakigbisog. Matod sa nasudnong kapangulohan sa Partido, kini ang pinakadaku nga deployment sa mga kadre sa kasyudaran padulong sa kabanikanhan sa tibuok nga Partido niining panahona.

Ang maong deployment gikan sa kasyudaran ug white area padulong sa kabanikanhan naka-papaspas sa subling pagpakusog sa mga rebolusyonaryong pwersa para sa armadong pakigbisog. Sobra 100 ka mga baryo sa 11 ka lungsod ug tulo ka syudad ang naabot sa paglihok sa mga yunit sa Hukbo sa tulo ka larangang gerilya gikan 1994 kutob 1999.

Apan ang palisiya nga “*pasumbagon sa hangin ang kaaway*” nahimong usa-ka-bahin nga palisiya nga naghatag og gibug-aton sa gimbuhatong masa ug rekoberi nga walay taktikal nga opensiba sulod sa unom ka tuig sukad 1994 kutob 1999. Gitul-id



kini sa tuig 2000 pinaagi sa paglunsad sa unang taktikal nga opensiba sa pormang ambus sa kumbinadong pwersa sa seksyon kadakuon nga Regional Strike Force ug yunit sa Larangan 2 batok sa mga CAFGU sa Sityo Namulo I, Brgy. Payao, Binalbagan niadtong Pebrero 2000 nga ningresulta sa pagkapatay sa duha ka CAFGU ug usa ka regular nga sundalo, ug pagkasamad sa usa pa. Nakompiska gikan kanila ang upat ka tag-as nga kalibreng armas.

Ang nahamtang nga tulo ka larangang gerilya sa Central Negros nahimong target sa kampanya sa pagpuo sa kaaway. Namatikdan niini ang subling pagkusog sa mga rebolusyonaryong pwersa ug natultulan kini sa mga espisipikong lugar sa Central Negros. Tungod niini, gibalik sa Philippine Army gikan sa Philippine National Police (PNP) ang responsibilidad sa *Internal Security Operations*. Sa katapusang bahin sa 1998, niabot ang 61st Infantry Battalion

(IB), 11th IB ug 66th IB nga dugang sa nagtunhay nga 6th Special Forces Battalion, 3rd Scout Ranger Company ug 7th Regional Mobile Group (RMG) Battalion diri sa isla. Giisip sa Oplan Makabayan sa rehimeng Estrada ang isla sa Negros nga usa sa tulo ka rehiyon nga nyutralisahon ang nikusog og balik nga “*local communist movement*.”

Niadtong 1999 ug 2000, gilunsad sa 303rd Brigade ang tulo ka kontra-insurhensyang kampanya militar batok sa bag-o lang nikusog pag-usab nga Partido Komunista sa isla ug mga yunit sa BHB sa Negros. Nahimong target sa pagpuo ang kapangulohan sa Partido ug ang SDG sa BHB sa rehiyon (RSDG) nga nagresulta sa tulo ka engkwentrohanay. Apan napakyas ang kaaway sa tinguha niini.


Gitan-aw sa Partido nga ang tulo ka sikbit nga gagmay nga larangang gerilya sa Central Negros vulnerable nga mapukan sa brigada kadakuon nga dagko nga

pokus ug sustenidong kampanya militar sa kaaway. Nagdesisyon ang Partido nga “inaton ang pokus sa kaaway sa halapad nga lugar pinaagi sa pagpadala og ekspansyon yunit sa norte ug sa southwest nga bahin sa Negros para malikayan nga mapapas sa dagko nga kampanya militar sa kaaway ang mga larangang gerilya sa Central Negros.”

Sa maong desisyon, nagma-daugon ang pagtukod sa larangang gerilya sa norte ug sa southwest nga bahin sa Negros. Bisan nagkatag ang mga larangang gerilya sa lagyo nga mga lugar sa norte, central, southwest ug southeast nga bahin sa Negros sa tuig 2005 pataas, nakaposisyon kini sa mga estratrehikong lugar ug tereyn ug inanay nga nagpapas sa impluwensya sa RPA-ABB sa maong mga dapit. Samtang ang Southeast Negros subling nablihan isip laing teatro sa giyera sa isla sa Negros pinaagi sa pagsulod sa yunit sa BHB gikan sa laing rehiyon.

Engkwentrohanay tali sa RSDG sa BHB batok sa Philippine Army (1999-2000)

- 1** Agosto 15, 1999
Sityo Pinangimnan, Brgy. Trinidad, Guihulgan, Negros Oriental
- 2** Hulyo 2000
Sityo Puting Bato, Brgy. Lag-it, Tayasan, Negros Oriental
- 3** Agosto 2000
Sityo Tahud Lahas, Brgy. Carabalan, Himamaylan City, Negros Occidental



Pag-ilog sa inisyatiba ug paglunsad sa mga taktikal nga opensiba

Sa tuig 2000 pataas, daghan ang nalunsad nga sustenido ug mapangahason nga mga gagmay ug dagkung taktikal nga opensiba sa BHB sa Negros. Gamit ang tropa nga tim, iskwad, seksyon ug platon kadakuon ug, sa usa ka higayon kumpanya kadakuon. Naglunsad kini og anihilatibo ug atritibo nga mga taktikal nga opensiba sa mga porma nga reyd nga adunay buto, reyd nga walay buto, ambus, pagdis-arma, harasment, isnayingping, aksyon punitibo ug pagsilot.

Timaan sa gerilya nga pakig-gubat ang pagpadugo sa kaaway pinaagi sa liboan nga samad sa lawas ug panalagsa nga bunal sa ulo. Ang BHB sa isla sa Negros adunay usa ka lebel nga naabot sa paglunsad og mga taktikal nga opensiba nga nigamit og pormasyong platon ug kumpanya. Kini nga kadakuon sa tropa ang makapatuman sa papel sa “panalagsa nga bunal sa ulo” samtang ang mga tim ug iskwad ang makapatuman sa “liboan nga samad sa lawas.” Pagkonsentra kini og superyor nga pwersa batok sa relatibong huyang nga bahin sa kaaway ug gipahimuslan ang elemento sa sorpresa mao nga masiguro ang kadaugan. Aduna usab signipikante nga gidaghanon sa mga atritibong aksyon nga gipatuman sa mga tim ug iskwad sa BHB ug yunit milisya ang niresulta sa pagkumpiska og mga armas ug pagkusog sa baseng masa.

Ang kaaway estratehikong superyor sa BHB, napulo ka sundalo sa usa ka Pulang manggugubat, apan ang BHB mahimong makabot og taktikal nga superyoridad batok sa kaaway, napulo ka Pulang manggugubat sa usa ka sundalo, pinaagi sa pagkonsentra og superyor nga pwersa batok sa huyang nga bahin sa kaaway sa iyang mga taktikal nga opensiba. Base sa kasinatian ug lebel sa kapasidad, mahimo sa mga yunit

Mga Batakang Taktikal nga Opensiba (2004-2014)

***Kinatibuk-ang nakumpiska nga tag-as nga kalibre nga armas: 18
Gigamit nga pwersa sa BHB:
Platon-kadakuon***



- 1** Pebrero 2004
Reyd sa CAFGU detatsment
Brgy. Mahalang, Himamaylan City,
Negros Occidental
- 2** Nobyembre 2007
Reyd sa istasyon sa PNP-La Libertad
La Libertad, Negros Oriental
- 3** Mayo 2013
Ambus batok sa 47th IB
Sityo Samac, Brgy. Camindangan,
Sipalay City, Negros Occidental
- 4** Abril 2014
Ambus batok sa PDT sa Philippine Army
Sityo Madaha, Brgy. Buenavista,
Himamaylan City, Negros Occidental

***Kinatibuk-ang nakumpiska nga tag-as nga kalibre nga armas: 21
Gigamit nga pwersa sa BHB: Kompanya-kadakuon
Nakab-ot ang kompleto nga anihilasyon sa kaaway***

- 1** Agosto 2010
Reyd sa CAFGU detatsment
Sityo Pulpangyan, Sagay City,
Negros Occidental

sa BHB nga puntiryahon ang mga relatibong huyang nga mga CAFGU detatsment sa sulod ukon kasikbit sa mga larangang gerilya, mga istasyon sa pulis sa mga lungsod ug mga armadong goons sa mga kriminal nga sindikato. Kinahanglan lang nga andamon ang igo nga inteledyens ug rekonaysans, kuti nga pagtuon sa target, paggamit sa elemento sa sorpresa ug igo nga pagpangandam apil ang kanunay nga pagbansay sa wala pa ang aktwal nga aksyon. Adunay mga taktikal nga opensiba nga madaogon ug nakahakot og sig-nipikanteng gidaghanon sa armas.

Sa tuig 2008 kutob 2010,

nahimong prayoridad sa mga kontra-insurhensyang kampanya sa AFP Central Command ang isla sa Negros. Sukad 2011 hangtod 2013, kabahin kini sa nasud-nong prayoridad sa AFP.

Ang Oplan Daba-daba nga giumol sa Regional Operational Command sa BHB Negros sa tuig 2011 nakapakurat sa kaaway. Gitiman-an kini sa kuyanap nga mga harasment, isnayping, aksyon punitibo batok sa mga agalong yutaan, operasyon isparo batok sa mga ispesipikong target, ambus sa usa ka kolum sa RMG sa Norte ug pagbutang og sobra pito ka “NPA Tsekpoynt” sa nagkadaiyang

lugar. Adunay 22 ka anihilatibo ug atritibong aksyon militar ang gilunsad nga nakakompiska og pito ka tag-as nga kalibre nga armas ug tulo ka mubo nga armas. Nakahatag kini og kadaut sa kaaway kon sa diin 12 ang patay ug lima ang samaron.


Isip reaksyon sa kaaway, gilunsad niini ang todo-larga nga dagkong mga operasyon militar batok sa tanang larangang gerilya sa BHB sa isla nga niresulta sa pagkatag sa mga yunit gerilya sa mas halapad nga mga lugar para makalikay sa dagkong hapak sa kaaway.

***Porma sa taktikal nga opensiba: Beyd
Kinaatibuk-ang nakompiska nga tag-as nga
kalibre nga armas: 75
(2002-2015)***

- 1** 2002 - batok sa RPA-ABB
Brgy. Biao, Binalbagan, Negros Occidental
- 2** 2003 - batok sa RPA-ABB
Sta. Catalina, Negros Oriental
- 3** 2004 - batok sa RPA-ABB
La Castellana, Negros Occidental
- 4** 2004 - batok sa CAFGU detatsment
Brgy. Mahalang, Himamaylan City,
Negros Occidental
- 5** 2007 - batok sa PNP-La Libertad
La Libertad, Negros Oriental
- 6** Abril 2010 - batok sa mga *security
personnel* sa Philex Mining
Sipalay City, Negros Occidental
- 7** Agosto 2010 - batok sa CAFGU detatsment
Sityo Pulupangyan, Brgy Bug-ang,
Toboso, Negros Occidental
- 8** 2011 - batok sa mga *security personnel*
sa fishpond ni Sarosa-Marañon
Sagay City, Negros Occidental

***Porma sa taktikal nga opensiba: Ambus
Kinatibuk-ang nakompiska nga tag-as nga
kalibre nga armas: 16
(2009-2016)***

- 1** Disyembre 2009 - batok sa 61st IB
Sityo Indangawan, Brgy. Manlocahoc,
Sipalay City, Negros Occidental
- 2** Mayo 2013 - batok sa 47th IB
Sityo Samac, Brgy. Camindangan,
Sipalay City, Negros Occidental
- 3** Abril 2014 - batok sa PDT sa Phil. Army
Sityo Madaha, Brgy. Buenavista,
Himamaylan City, Negros Occidental
- 4** Pebrero 2016 -
batok sa Candoni PNP
Candoni, Negros
Occidental
- 5** Mayo 2016 -
batok sa 62nd IB
Sityo Carbon,
Brgy. San Isidro,
Toboso, Negros
Occidental





Ang kontrapyudal nga kalihukang masa

Ang kadaugan nga naangkon sa pakigbisog sa yuta sama sa pagposisyon sa mga yuta sa mga agalong yutaan sa norte, central ug habagatang bahin sa isla panahon sa dekada '80 nihuyang kadungan sa pagluya sa kusog sa BHB ug sa baseng masa. Bisan signipikanteng bahin sa mga kayutaan sa mga agalong yutaan ang wala na nabalik sa ilaha, nikusog og balik ang ilang gahum sa kabanikanhan ug adunay hulga nga ilang ilogon pag-usab ang mga yuta nga napolisyonan na sa mga mag-uuma ug mamumuo sa uma.

Panahon sa IBKP, sa katapusang bahin sa dekada '90 ug sayong bahin sa 2000, sa kahintang nga rekoberi ang gitutukan sa gimbuhatong masa, gipasulong ang ligal nga paggamit sa Comprehensive Agrarian Reform Program (CARP) o pag-aplay og petition for coverage sa mga benepisyaryo sa yuta hilabi na sa mga yuta nga gipailawom sa Voluntary Offer to Sell (VOS), Compulsory Acquisition (CA), ug uban pa ug ang pagduso sa mga *money claims* ug *wage differentials*.

Inanay nga nikuyanap ang mga kontrapyudal nga pakigbisog sa tanang larangang gerilya apan,

sa kinatibuk-an, ginagmay, katagkatag ug dili koordinado sa lungsod nga lebel. Nakalunsad og pagkigbisog batok sa pagpangilog sa yuta, mga pakigbisog sa pagpataas sa presyo sa saging, kape ug kopra, ug pagpataas sa bahin sa mag-uuma sa produkto sa yuta. Partikular sa North Negros, ang pakigbisog sa *wage differentials* nakaangkon ug kadaugan diha sa desisyon sa Korte Suprema nga kinahanglan ang agalong yutaan mobayad og Php 1.4 milyon sa mga mamumuo sa uma. Sa Southeast Negros, ang pagsupak sa pagpatanom og jathropa sa Tamlang Valley nakaab-ot sa kinaiyang intermunisipal nga pakigbisog.

Sugod 2008, inanay nga nikusog ang pakigbisog sa pagpusisyon sa yuta nga nagsugod sa Bago City, Negros Occidental hangtod nga nikaylap sa halapad nga mga asyenda sa Negros. Dugang naagni ang pag-init ug pagkusog sa mga pagpusisyon sa yuta pinaagi sa bungkalan sa dihang nikusog ang mga taktikal nga opensiba sa BHB sa tuig 2010 ug 2011. Niabot sa 53 ka mga asyenda sa norte, central ug habagatang bahin sa Negros ang nasakop sa bungkalan. Anaa sa 2,317 ektarya ang gilang-

kob ug 899.39 ektarya ang gitamnan og tubo, humay, mais, saging, mga utanon, mga lagutmon ug uban pa. Dihay kinatibuk-ang benepisyaryo nga 6,012 ka indibidwal sulod sa 1,503 ka bubong.

Ang 53 porsiyento sa mga bungkalan anaa sa Escalante City, Negros Occidental ug sa mga utlanan niini sa Sagay City ug Toboso sa parehong probinsya. Dili katingalahan nga ang 3rd Civil Military Operations (CMO) Battalion sa kaaway gibutang sa Escalante City sa tuig 2012 kutob 2014.

Ang dakung kadaugan sa bungkalan mao ang pagtaas sa militansya ug paghait sa kaamguhang kontrapyudal sa masang mag-uuma. Ang kampuhan o *camp-out* nahimong importante nga bahin sa pakigbisog sa pagposisyon sa yuta. Nahimo kining eskwelahan sa organisadong paglihok sa mga mag-uuma ug mamumuo sa uma diha sa ilang pakigbisog. Tigomanan kini para sa ilang pag-umol og plano ug paghimo og organisadong mga lakang sa pagpaabante ug pagdepensa sa ilang nakab-ot nga mga kadaugan sa pakigbisog. Nahimo kining lugar sa paglunsad

og mga pagtuon sa kurso sa Pambansa Demokratikong Paa-ralan (PADEPA) ug mga pag-bansay sa produksyon, pag-or-ganisa, pagpropaganda ug mga kultural nga aktibidad.

Sa dihang nagdugay ang mga bungkalan, inanay nihulpa ang relatibong lapad nga simpatiya ug suporta sa ubang sektor hilabi na sa nahanungang pwersa ug pila ka opisyal sa barangay ug lungsod. Ang pagsuportahanay sa mga mag-uuma sa lain-lain asyenda nang-luya usab. Nitumaw ang tendensiya sa pagkamadali-dalion ug pag-luag sa pagpundar sa mga reki-sitos sa paglunsad og bungkalan. Nahimo kining bulnerable sa pintas nga reaksyon sa mga dagkung agalong yutaan.

Bisan ang bungkalan nigamit og mga balaod sa peke nga CARP, niaghat kini og grabeng reaksyon sa mga agalong yutaan tungod gihagit niini ang ilang pagpanag-iy sa yuta pinaagi sa pagpusiyon ug pagpalarga sa bungkalan sa mga mag-uuma. Ang pagmasaker sa siyam ka mag-uuma nga nagpa-higayon og bungkalan sa Hacienda Nene sa Sagay City niadtong Ok-tubre 2018 resulta sa maong ulahi nga paglambo.

Gawas pa, usa ka bahin lang ang gitutokan sa kontrapyudal nga pakigbisog sa bungkalan ug wala gihatagan og atensyon ang pakig-bisog sa pagpataas sa suhulan sa mga mamumuo sa uma, korapsyon ug pagdumili sa paghatag sa mga mamumuo sa tubo sa Social Ame-ioration Fund (SAF) ug uban pa.

Sa kinatibuk-an, ang mga ka-daugan sa mga taktikal nga open-siba ug kontrapyudal nga pakig-bisog niining panahona nagpalapad sa mga organisasyong masa, du-gang nakatukod og mga organo sa gahum pampulitika sa baryo ug nagsabwag sa impluwensiya sa rebolusyonaryong kalihukan sa lapad nga katawhang Negrosanon.

Panahon sa kusganon ug dagko nga mga FMO/RCSP sa AFP

Sa panahon sa rehimeng Duterte, gilatang ang basehan sa kusganon ug dagko nga mga ataki batok sa mga rebolusyonaryong pwersa ug katawhan sa tibuok nasud ug sa isla sa Negros. Gikan-sela sa rehimeng Duterte ang Negosasyon sa Kalinaw tali sa Government of the Republic of the Philippines (GRP) ug National Democratic Front of the Philippines (NDFP) niadtong Nobyembre 2017. Gideklara niini nga teroristang organisasyon ang PKP ug BHB niadtong Disyembre 2017 ug gipakanaug ang Memorandum Order 32 sa rehiyon sa Bicol ug mga isla sa Samar ug Negros. Gi-pakanaog usab ang Executive Order 70 nga nagtukod sa National Task Force (NTF)-Elcac para sa *whole of nation approach* nga mosilbi sa pagpagrabe sa ilang kontra-insurhensyang kampanya batok sa rebolusyonaryong kalihukan sa tibuok nasud.

Pinaagi sa Joint Task Force-Kapanatagan ug NTF-Elcac, gi-pangulohan ni Duterte, kakuyog ang mga tag-as nga opisyal sa militar ug mga retiradong heneral, ang pagmobilisa sa tibuok AFP-PNP-CAFGU, tanang mga sibilyang ahensya sa gobyerno, mga pribadong sektor sa negosyo, institusyon ug mga organisasyon ug personalidad para ihimulag ug puohon ang mga rebolusyonaryong pwersa. Gimando ni Duterte ang todo-larga ug dagko nga operasyong militar ug kontrakomunista ug itom nga propaganda sa tuman nga pagpakamalaut sa PKP, BHB ug NDFP apil ang mga ligal ug prog-resibo nga mga organisasyon, personalidad ug mga oposisyon.

Manipestasyon sa todo-larga nga pasismo sa berdugong re-himen ni Duterte sa isla sa Negros ang kuyanap ug dayag nga pag-ataki sa 79th IB ug 6th Special Action Force Battalion (6SAF) sa Brgy. Washington, Escalante City niadtong Nobyembre 2018, ang maduguon nga Oplan Sauron 1 ug 2 sa AFP/PNP niadtong Disyembre 2018 ug Marso 2019, ug ang malaparan nga joint operation sa AFP/PNP sa Canlaon City, Guihulngan City, Manjuyod, Bindoy, Sta. Catalina sa Negros Oriental diin sobra 25 ka personahe ang gipatay ug masobra 50 ang gidakop.

Ang mga larangang gerilya sa Negros nga relatibong gamay pa kumpara sa kadakuon sa kaaway nga naa diri sa isla, nahimong bulnerable sa dagko ug kusganon nga mga operasyong militar sa kaaway. Ang tanang mga larangang gerilya sugod 2019 kutob 2022, sustenido nga gilunsaran og mga *focused military operation* (FMO) ug Retooled Community Support Program (RCSP) sa lain-lain ang-ang, sa pinakamenos usa hangtod duha ka batalyon sa kaaway sa usa ka panahon.

Nakaangkon og signipikanteng kadaut ang BHB atubangan sa kumplikado ug kusganong mga FMO/RCSP sa kaaway. Napahimuslan sa kaaway ang pagtunhay sa mga seryoso nga kahuyangan ug sayop sa pila ka yunit sa BHB sama sa pagtenir sa markadong mga lugar, pagluag sa disiplina sa mga lagda militar, wala pag-gawas sa kahon sa FMO/RCSP sa kaaway, dili pagseryoso sa namatikdan nga mga indikasyon sa peligro sa seguridad, ug ang kakulang sa lawom nga pagtuon sa nagtunhay nga kahimtang militar.

Nagpasidaan na ang Partido sa disenyo sa kontrarebolusyo-naryong opensiba sa kaaway. Dihay *large-scale force deployment*,

Mga disenyo sa kontrarebolusyonaryo nga opensiba sa AFP

Large-scale force deployment - dugangan sa kaaway ang miaging lebel sa konsentrasyon sa ilang pasistang tropa sa mga gitakda nila nga prayoridad nga erya sa BHB.

Operations in-depth - nakapwesto ang mga sentro sa kuman sa mga batalyon sa AFP sa sulod mismo sa mga larangang gerilya ug nahimutang ang ilang mga kumpanya sa kasikbit nga bahin sa pokus nga erya, adunay sustenidong dagko nga operasyon kakumbina sa lapad nga mga operasyong RCSP, operasyong istrayk sa mga sentro de grabidad sa rebolusyonaryong kalihokan sa erya ug paggukod og desaysibo nga sangka sa mga yunit sa BHB.

Gradual constriction - nagtinguha nga himuong hiktin ang erya para sa maniobra sa BHB nga daw inanay nga gituok. Mao kini ang konsepto ug pamaagi sa *win-hold-win* ug permi nga nag-apas ang kaaway sa desyasibo nga sangka.

Blockhouse warfare - usa-usa nga pagpokus sa mga larangang gerilya ug pag-hold sa nahuman nga bahin.

Venus flytrap - pag-atake sa tunga aron matukmod ang mga yunit sa BHB padulong sa lit-ag nga dili kaayo lig-on nga bahin sa erya kung diin nahimutang ang lambat paniktik sa kaaway ug andam na ang ilang mga pwersang pang-atake ug panggukod. Mahimo nga gituyo nga menos ang operasyon sa AFP sa ilang giandam nga dapit aron didto mo-atras ug makahon ang giabog nga pwersa sa BHB.

Heartland attack - pagdumog sa pwersa ug atake sa kaaway sa giila nga pinakaso-lido nga bahin sa pokus nga erya.

Full force support sang mga moderno nga kagamitan militar - Lakip niini ang paggamit sa mga *attack* ug *surveillance drone*, *detonating drone*, mga *scout* ug *attack helicopter*, eroplano nga pangbomba, kanyon ug APC (*armored personnel carrier tanks*). Sa kasamtangan, gagamit og *drone* sa lebel sa batalyon para sa ilang mga taktikal nga operasyon.

operations in-depth, gradual constriction, blockhouse warfare, venus flytrap, heartland attack, malaparan nga operasyong RCSP, *full force support* sa mga modernong kahimanan militar para ayudahan ang mga dagko ug kusganon nga operasyon sa pasistang AFP ug PNP.

Bisan pa sa dagko ug sustenido nga FMO/RCSP sa mga tropa sa 303rd ug 302nd Brigade sa AFP ug mga batalyon sa SAF ug RMF

sa PNP sa tanang mga larangang gerilya sa BHB, napahimuslan gi-hapon sa BHB ang inisyatiba sa paglunsad og mga taktikal nga opensiba nga pleksible nga nigitmit og tim, iskwad, platon ug *oversized* platon nga nakasakmit og pila ka matag-as nga kalibre nga armas ug daghang mga mubong armas, bala ug uban pang kahimanan militar.

Nalunsad gani sa BHB Negros ang upat ka kontrakampanya sa

tulo ka larangang gerilya niadtong ikaduhang bahin sa 2020 ug unang bahin sa 2021 nga nakahatag og kadaut sa kaaway ug nakapreserba sa BHB. Dugang pa, padayon nga napalapad ang mga eryang nakober sa mga larangang gerilya. Nagmaya ang mga masa sa mga bag-ong dapit nga nabalikan human sa pila ka dekada nga wala na sila makakita og Pulang hukbo.

Mga hagit nga atubangon ug mga tahas nga hinanaling tungdan

Sa kasamtangan, ang isla sa Negros usa sa nasudnong prayoridad para sa paglunsad og mga dagko ug bayolente nga kampanya kontrarebolusyonaryo sa AFP ug PNP. Gihimuslan niini ang pagpatay kang Gob. Roel Degamo isip rason para mas pakusgon ang operasyong militar sa isla pinaagi sa pagdugang sa 47th IB ug 50 ka tropa sa Light Reaction Company. Nagpakaylap usab kini og makinaryas sa pagpangilad aron tabonan ang ilang pakyas nga kampanya ug isabwag ang naratibo nga “pagdaog sa giyera batok sa rebolusyonaryong kalihukan.”

Ang makalilisang nga kontrarebolusyonaryong giyera sa AFP ug PNP magsilbi sa interes sa lokal nga nagharing hut-ong. Sa nag-ung-ong nga implementasyon sa Negros Island Region, nagindigay ang nagharing hut-ong gikan sa duha ka probinsya sa Negros para sa dominasyon. Apan, lig-on ang ilang paghiusa kontra sa rebolusyonaryong kalihukan nga maoy pinakakusgan nga babag sa ilang interes sa isla.

Katuyoan sa mga dagko ug bayolente nga operasyong militar nga pahilumon ug ipabilin nga gigapos ang masang Negrosanon sa *monocrop* nga industriya sa kalamay. Nagkagrabe ang kahimtang sa mumumuo sa kampo sa ubos nga suholan (kasagaran P250 ang adlaw) samtang nisirit ang presyo sa mga batakang palaliton. Kuyanap usab ang kontraktwalisasyon sa mga asyenda ug sentrales. Nadugangan pa ang pagantus sa katawhang Negrosanon sa mga neoliberal nga palisiya ug mga proyekto sa langyaw'ng kapitalista ug dagkong komprador burgesya sama sa importasyon sa kalamay ug bugas, pribatisasyon sa tubig, kuryente ug transportasyon, deregulasyon sa gasolina, ug konbersyon sa mga uma ug pangisdaan padulong sa komer-

syal nga gamit nga kasagaran gihimong mga *economic zones*, *real estate* ug eko-turismo.

Ang sosyo-ekonomikong kahimtang sa isla sa Negros tabunok nga yuta para sa dugang nga pagtubo sa rebolusyon. Dapat andam ang mga rebolusyonaryong pwersa hilabi na ang BHB sa pag-atubang sa kasamtangang mga hagit ug pagpatuman sa mga hinanaling mga tahas.

1 Kinahanglan hugot nga malambigit ang teorya ug praktika. Magkaatbang kini sila apan naghiusa sa walay hunong nga proseso sa paglihok. Ang teorya matransporma sa praktika sa mas taas nga ang-ang samtang ang praktika matransporma sa teorya sa laing taas nga ang-ang. Ang ilang pagkumbina walay hunong; ang daan mawala ug anaay bag-o nga motumaw. Ang mga problema sa giyera nagkakumplikado ug nag-uswag; walay hunong ang paglihok.

Kinahanglan ang atong mga kadre militar magkat-on sa lawom nga paghunahuna para bisan sa inanay ug mainantuson nga paagi husto nga matun-an ug masulbad ang mga problema sa atong gilunsad nga gubat sa katawhan. Kung hait ang atong pag-observer sa nagtunhay nga mga butang ug sitwasyon, kung ang atong panghunahuna mosibo o duol ang pagbanabana sa mga obhetibong kondisyon, mahimong husto ang atong mga lakang sa pagsulbad sa nagtunhay nga mga problema. Ang mga prinsipyo ug ideya nagsalamin sa naglihok nga obhetibong mga bagay gawas sa utok sa tawo ug kining mga butanga dili makita sa mata. Masabtan lang kini pinaagi sa lawom nga paghunahuna. Wala nay laing pamaagi.

Pangibabawan ang mekanikal



ug emperisistang metodo sa pagtuon ug pagsulbad sa mga problema sa atong partikular nga rebolusyonaryong giyera. Magtuon sa rebolusyonaryong teorya para maayo kining maaplikar sa kongkretong kahimtang ug praktika. Gamiton ang Marxismo-Leninismo-Maoismo, ang diyalektika, ang balaod sa kontradiksyon sa pagsulong sa atong gubat sa katawhan sa mamugnaon nga pamaagi.

Importante nga maayo kita sa pagtuon sa mga positibo ug negatibo nga leksyon sa atong kasinatian ug komprontahon ug resolbahon ang nagtunhay nga mga sayop ug kahuyangan. Walay hunong nga ilhon ang kaaway ug ang atong kaugalingon, ug pahaiton ang pagsabot sa mga balaod sa atong gubat sa katawhan ug sa gerilyang pakiggubat sa kasamtangang ang-ang sa estratehikong depensiba. Hatagan usab og taas nga importansya ang mga patakaran ug pagpatin-aw sa Partido nga napanahon nga gipagawas.

2 Padayon nga isulong ang kuyanap ug sunson nga gerilyang pakiggubat base sa nagkalapad ug nagkalawom nga baseng masa. Batokan ang nagtunhay nga sulog sa konserbationg militar sa mga yunit sa BHB sa rehiyon ug sa mga larangang gerilya. Iisa ang determinasyon, katakos ug kaisog sa mga kumand sa BHB sa lain-laing lebel sa pagpalarga sa inisyatiba ug pleksibilidad, sa maayong pagplano, pagdumala ug koordinasyon sa nagkadaiyang yunit. Hagit sa mga Pulang kumander ug mga manggugubat sa BHB ang pagpalambo sa katakos sa pakiggubat, sa taktika ug teknika sa lain-laing tipo sa mga anihilatibo ug atritibong mga taktikal nga opensiba.

Mahimong andam sa dugang pa nga mga kalisdanan ug sakripisyo. Iisa ang determinasyon sa mga rebolusyonaryong pwersa nga madasigong pakasyon ang plano sa pasistang rehimen ni Marcos II nga gub-on ang mga rebolusyonaryong pwersa niining ikaduhang tuig sa iyang termino.

Ilunsad ang mga kontra-kampanya sa rehiyon ug mga larangang gerilya batok sa kampanya sa kaaway. Ang FMO ug

RCSP sa AFP mahimong pakasyon sa mga yunit sa BHB. Ang kampanya sa mga solido nga batakanang taktikal nga opensiba sa BHB nga makapapas sa kaaway ang pinaka-pektibo nga pamaagi sa pagkompronta sa mga FMO. Mahimo silang pahamtangan og dagko nga kadaut sa BHB pinaagi sa suporta sa masa, pagpili sa paborableng tereyn, pagpamilyarisa sa mga ruta ug padron sa ilang sulod-gawas, paggamit og superyor nga pwersa sa BHB relatibo sa target, maayong paggamit sa mga *command-detonated explosives* ug hustong panahon sa diin kapoy na ang mga tropa sa kaaway sa pila na ka adlaw nga operasyon. Kumbinahan kini og serye sa mga atritibong aksyon militar batok sa naglihok nga dagko nga tropa sa kaaway, sa ilang mga linya sa komunikasyon, transportasyon ug suplay ug uban pa.

Ang mga kontrakampanya makapalambo sa BHB sa iyang kasinatian sa pakiggubat; makapauswag sa katakos sa kumand ug koordinasyon, sa paniktik, pagplano ug operasyon; sa taktika ug teknika; ug makapataas sa pangkombat nga katakos sa mga yunit gerilya sa BHB.

Para epektibo nga maatubang sa BHB ang dagko ug kusganon nga kontrarebolusyonaryong kampanya sa AFP ug PNP, ang kondukta sa paglihok niini kinahanglang adunay hugot nga paghupot sa prinsipyo sa estruktura sa pwersa. Relatibong konsentrasyon sa nangunang yunit, relatibong dispersal sa mga segundaryong yunit ug positibong korelasyon sa mga yunit para sa koordinasyon, pagtinabangay ug pagsuportahanay sa pagpatuman sa mga gimbuhaton hilabi na sa taktikal nga opensiba. Paagi niini, hugot nga magunitan ang inisyatiba atubangan sa gaataki nga kaaway ug mabuntog ang pagkapasibo sa kahimtang nga ang kaaway superyor sa gidaghanon sa tropa, sa kahimanang militar, sa pagbansay, ug uban pa.

Para mahuptan ang inisyatiba, pleksible nga mogamit og tim, iskwad, platun ug kumpanya sa paglunsad og taktikal nga opensiba. Magkonsentra sa paglunsad og mga anihilatibong taktikal nga opensiba, magdispers para sa gimbuhatong masa, propaganda, pag-organisa, ug mobalhin para makalikay sa dagkong bira sa kaaway o para sa uban usab nga gimbuhaton sa laing



erya. Magpakamaayo sa gerilyang taktika sa pagkonsentra, pagdispers ug pagbalhin nga mosibo sa nagtunhay nga kahimtang sa kinatibuk-ang lugar.

Sa kahimtang nga gipalambo pa nato ang tukma nga estruktura sa pwersa ug adunay nagkadaiyang lebel ang mga larangang gerilya sa isla, motakda og nangunang yunit ug anaay mga secondaryong yunit. Ang nangunang yunit dapat anaa sa relatibong konsentrasyon ug ang mga secondaryong yunit anaa sa relatibong dispersal nga adunay kinatibuk-ang positibong korelasyon sa naglihok nga mga yunit para sa koordinasyon, pagtinabangay ug pagsuportahanay engkaso dihay mahitabo nga wala makonsidera sa dalagan sa pagpatuman sa mga gimbuhaton ug pag-atubang sa gaataki nga kaaway.

Ang positibo nga korelasyon sa mga yunit sa BHB mobunga og relatibong taas nga ang-ang sa inisyatiba ug pleksibilidad. Bisan sa mubong panahon, makahimo kini og taktikal nga superyoridad batok sa kaaway. Bisan unsa ka mubo ang taktikal nga superyoridad kun husto nga magamit, daku na nga butang para sa BHB nga sa kinatibuk-an imperyor ug ang kaaway superyor sa estra-tehiya.

Ang kaaway dili usab kanunay nakakonsentra sa dagkong kolum. Ma-obliga usab sila nga modispers sa lain-laing gagmay nga kolum tungod sa lisud nga tereyn sa isla sa Negros. Diri ipatumaw ang pagkamapangahason ug pagkamamugnaon sa mga kumander ug ginsakpan sa mga yunit sa BHB. Dili motumaw ang positibo nga korelasyon sa mga absolutong nakadispers nga mga yunit sa BHB. Dili usab buot ipasabot nga adunay positibo nga korelasyon sa sobrang nakakonsentrang dako nga yunit. Ang



mahinungdanon mao ang relatibong konsentrasyon sa nangunang yunit ug relatibong dispersal sa mga secondaryong yunit. Ang inisyatiba ug pleksibilidad dako nga hisgutanan sa kondukta sa rebolusyonaryong Hukbo diha sa pagpalambo sa kaugalingon gikan sa gamay ug huyang padulong sa pagdaku ug pagkusog. Ang pasibidad modala sa Hukbo sa sukwahing direksyon.

Sa maong pamaagi paspas ang pagpalambo sa mga bag-ong kadre militar hilabi na sa han-ay sa mga batan-on nga sakop sa BHB nga adunay potensyal. Walay human-na-daan nga mga opisyal militar. Anaa lang sa palibot ang mga materyales nga pwede mapauswag. Sa mga relatibong nakadispers nga mga yunit, pwede hatagan og taktikal nga responsibilidad ang mga batan-on nga adunay potensyal nga mahimong lider militar. Kini lang og wala nay laing pamaagi ang pagpanday og mga bag-ong henerasyon sa mga kadre para mangulo ug mokuha og responsibilidad sa lain-laing lebel.

Kinahanglan usab magemploy og semi-ligal nga mga tim sa mga lugar nga dili pa kaya nga kab-oton sa mga yunit sa BHB para sa dugang pa nga

pagpapasas sa pagkab-ot sa mas lapad nga lugar.

3 Ipataas ang paninguha sa kuyanap nga pagpukaw, pagorganisa ug pagpalihok sa malapad nga masa. Isulong ang lapad nga pagsukol sa militarisasyon sa kabanikanhan, sa daghang paglapas sa tawhanong katungod sama sa pagpamomba nga nakapalisang sa katawhan, pagpamugos nga mag-surender isip sakop sa BHB o tigsuporta niini, grabe nga pagpanghulga, ekstrahudisyal nga pagpamatay, pagkontrol sa lihok sa mga mag-uuma nga anaay epekto sa ilang panginabuhian, ug pagtiner sa mga panimalay sa masa, barangay hall, simbahan ug eskwelahan nga naglapas sa internasyunal nga makitawhanon nga balaod ug tawhanong katungod.

Malaparan nga ibuwelo ang pagpukaw, pagorganisa ug pagmobilisa sa mga mamumuo, mamumuo sa uma, alang-alang-proletaryado, ug mga mag-uuma para modemanda sa pagpataas sa suholan ug paghatag sa mga benepisyo atubangan sa walay hunong nga pagtaas sa presyo sa gasolina ug sa mga batakang palaliton.

Ang maglanog-lanog ug mada-ugon mga taktikal nga opensiba sa BHB mohatag og inspirasyon sa katawhang Negrosanon ug dugang modani sa ila nga mosuporta ug direktang mosalmot sa pagsulong sa rebolusyonaryong armadong pakigbisog. Mohatag usab kini og inspirasyon ug mogagni sa mga mamumuo, maguuma, mamumuo sa uma, kabus nga taga-dakbayan, mga drayber sa dyip, mananagat, ug petiburgesya sa kasyudaran nga molunsad og nagkadaiyang porma sa pakigbisog para isulong ang

ilang mga ekonomiko ug demokratikong mga demanda batok sa pagpanghimulos ug pagpamig-ot sa mga reaksyonaryong naghari nga dagkong negosyante-kumprador, dagkong agalong yutaanasendero ug dagkong burukratamilitar sa isla.

Pinaagi sa pagpakusog sa armadong pakigbisog, pagpalagisik sa agraryong rebolusyon ug padayong pagtukod ug pagpalig-on sa mga organo sa gahum pampulitika sa isla sa Negros, mas mokusog ang mga rebolusyonaryong pwersa ug dugang mo-


lapad ang nagkahiusang prente batok sa reaksyonaryong kaaway taliwala sa nagkagrabeng krisis sa alang-alang kolonyal ug alang-alang pyudal nga reaksyonaryong sistema sa nasud ug sa krisis sa pangkalibutanong sistema sa kapitalismo.

Mabuhi ang Bagong Hukbong Bayan!

Mabuhi ang Partido

Komunista sa Pilipinas!

Mabuhi ang nakigbisog nga katawhang Negrosanon! *AP*



NegrosRevPortal